

3. Frumvarp til laga

um breyting á lögum nr. 50 31. maí 1927, og lögum nr. 70 28. desember 1934, um gjald af innlendum tollvörutegundum.

(Lagt fyrir alþingi 1937.)

1. gr.

Í stað ákvæðanna í 2. gr. laga nr. 50 31. maí 1927, um gjald af innlendum tollvörutegundum, og í 1. gr. laga nr. 70, 28. dec. 1934, um breyting á þeim lögum, komi svo hljóðandi ákvæði:

Fyrir tollvörutegundir, sem tilbúnar eru hér á landi, skal greiða gjald í ríkissjóð, er miða skal við aðflutningsgjaldið á hverri tollvörutegund eftir tollögum þeim, er gilda hverju sinni, þannig:

1. Fyrir gosdrykki, $\frac{1}{3}$ aðflutningsgjalds.
2. a. Fyrir öl, nema maltöl, $\frac{1}{2}$ aðflutningsgjalds.
b. Fyrir maltöl, $\frac{1}{6}$ aðflutningsgjalds.
3. Fyrir óáfeng vín, $\frac{1}{2}$ aðflutningsgjald.
4. Fyrir aldinsöft, límonaðisöft, litað sykurvatn með kjörnum og sams konar drykki, sem ætlaðir eru til drykkjar, $\frac{1}{3}$ aðflutningsgjalds.
5. Fyrir tóbaksvindla og tóbaksvindlinga, $\frac{1}{2}$ aðflutningsgjald.
6. Fyrir kaffibæti og kaffilíki, $\frac{1}{3}$ aðflutningsgjalds.
7. Fyrir sætindi, svo sem brjóstykur, karamellur, lakkrís og lakkrísvörur, mótað sætt marsipan, sykraða ávexti, sætar brenndar möndlur, tyggigúmmi, átsúkkulaði, rjómasúkkulaði, mjólkursúkkulaði (nýmjólkursúkkulaði), undanrennusúkkulaði, súkkulaðihúðað munngæti (t. d. kremsúkkulaði, krókantsúkkulaði).

marsipansúkkulaði, nógatsúkkulaði og konfekt), ávaxtasúkkulaði, hnotsúkkulaði, möndlusúkkulaði, rjómasúkkulaðihúð og mjólkursúkkulaðihúð, kókosbollur, „negrakossa“ og rjómalengjur, $\frac{1}{2}$ aðflutningsgjald.

8. Fyrir allar tegundir af breinu súkkulaði, t. d. suðusúkkulaði, iðnsúkkulaði og súkkulaðihúð, aðrar en þær, sem falla undir 7. tölulið þessarar greinar, $\frac{1}{2}$ aðflutningsgjald.

Verði ágreiningur um það, hvaða vörur skuli taldar og ekki taldar til framangreindra tollflokka, fellir fjármálaráðherra um það fullnaðarútskuð.

2. gr.

Lög þessi öðlast þegar gildi.

Athugasemdir við lagafrumvarp þetta:

Breytingar þær, sem samkvæmt frumvarpinu er ætlazt til að gerðar verði á lögnum um gjald af innlendum tollvörutegundum, leiða af breytingum, sem ætlazt er til að gerðar verði á ákvæðum tolllaganna, samkvæmt frumvarpi, sem lagt er fyrir þingið samtímis þessu frumvarpi, og nægir að vísa til greinargerðarinnar fyrir frumvarpinu að síðast greindum lögum og ástæðunum fyrir bráðabirgðalögum, sem lögð eru fyrir sem fylgiskjal með frumvarpi þessu.

Fylgiskjal.

Bráðabirgðalög um breyting á lögum nr. 50 31. maí 1927, og lögum nr. 70 28. dec. 1934, um gjald af innlendum tollvörutegundum.

Vér Christian hinn Tiundi, af guðs náð konungur Íslands og Danmerkur. Vinda og Gauta, hertogi í Slésvík, Holtsetalandi, Stórmæri, Þéttmerski, Láenborg og Aldinborg,

Gjörum kunnugt: Fjármálaráðherra Vor hefir tjáð Oss, að kveða þurfi nánara á um ákvæði í lögum nr. 50 31. maí 1927, og lögum nr. 70 28. dec. 1934, um breytingar á þeim lögum, til þess að koma í veg fyrir ágreining um, hvort téð ákvæði beri framvegis að skilja á sama hátt sem hingað til hefir verið gert við framkvæmd nefndra laga. Með því að svo er ástatt, teljum Vér nauðsyn bera til þess að gefa út bráðabirgðalög um þetta efni, samkvæmt 23. gr. stjórnarskrárinnar 18. maí 1920.

Því bjóðum Vér og skipum þannig:

1. gr.

Í stað ákvæðanna í 2. gr. laga nr. 50 31. maí 1927, um gjald af innlendum tollvörutegundum, og í 1. gr. laga nr. 70 28. dec. 1934, um breyting á þeim lögum, komi svo hljóðandi ákvæði:

Fyrir tollvörutegundir, sem tilbúnar eru hér á landi, skal greiða gjald í ríkissjóð, er miða skal við aðflutningsgjaldið á hverri tollvörutegund, eftir tolllögum þeim, er gilda hverju sinni, þannig:

- Fyrir tóbaksvindla og vindlinga, $\frac{1}{2}$ aðflutningsgjald.
- Fyrir brjóstsýkur, konfekt og súkkulaði, $\frac{1}{2}$ aðflutningsgjald.
- Fyrir kaffibæti, $\frac{1}{3}$ aðflutningsgjalds.
- Fyrir óáfeng vín, $\frac{1}{2}$ aðflutningsgjald.
- Fyrir ávaxtasafa og ávaxtasafalíki, svo sem litað sykurvatn með kjörnum, öl, annað en maltöl, límonaði og aðra sams konar drykki, sem ætlaðir eru óblandaðir til drykkjar, svo og sóðavatn, $\frac{1}{3}$ aðflutningsgjalds.

f. Fyrir maltöl, $\frac{1}{6}$ aðflutningsgjalds.
Verði ágreiningur um flokkun í framangreinda tollflokka, fellir fjármálaráð-
herra um það fullnaðarúrskurð.

2. gr.

Lög þessi öðlast þegar gildi.

Eftir þessu eiga allir hlutaðeigendur sér að hegða.

Gjört í Sorgenfrihöll, 25 september 1936.

Undir Vor konunglega hönd og innsigli.

Christian R.
(L. S.)

Eysteinn Jónsson.